



Nasionale dialoog: Kô laat ons praat

So het die eerste konvensie van die nasionale dialoog toe die afgelope naweek by Unisa in Pretoria plaasgevind. Daar was heelwat vername mense ... en heelparty wat eerder weggebly het.

'n Mens vra jou af waarom 'n nasionale dialoog hoegenaamd nodig is. Ek het nog nooit van so iets elders in die wêreld gehoor nie. Ek reken daar is net een rede waarom daar inderdaad onder baie mense 'n behoefte aan 'n nasionale dialoog is: die parlement en regering het ons gefaal – daar is 'n skreiende afwesigheid van leierskap.

Natuurlik lok die nasionale dialoog self nou warm debat uit: Wie se inisiatief is dit? Wie moet die proses stuur? Is die betrokkenes werklik verteenwoordigend van die hele bevolking? Kan daar regtig iets goeds uit hierdie Babelse verwarring voortspruit? Wie moet vir die gelag (en geweene en gekners van tande) betaal?

En ons? Wat staan ons as gelowiges te doen? Ek is bevrees die Bybel kan ons nie direk leiding gee nie. In die wêreld van die Bybel het die heersers hulle nie aan enkelinge gesteur nie. In daardie wêreld het maghebbers enige opstand met geweld bedwing.

Jesus het sy dissipels geleer: *Julle weet dat hulle wat as heersers oor die nasies beskou word, oor hulle baasspeel en dat hulle maghebbers oor hulle gesag uitoefen. So is dit egter nie by julle nie; maar wie belangrik onder julle wil wees, moet julle dienaar wees, en wie eerste onder julle wil wees, moet almal se slaaf wees. Want ook die Seun van die Mens het nie gekom om gedien te word nie, maar om te dien en sy lewe te gee as losprys vir baie* (Mark 10: 42-45, AFR2020).

Jesus – die Heer oor alles en almal – wou nie heers nie. Hy het kom dien deur te kyk, te luister en te praat. Hy het gesien toe hulle in Nain 'n weduwee se seun dood uit die huis uitdra (Luk 7: 13). Hy het geluister toe twee blindes agter Hom aanloop en vra: *Ontferm U oor ons, Seun van Dawid!* (Matt 9: 27). Hy het gepraat toe die skrifgeleerdes 'n prostituut wou stenig (Joh 8: 10-11).

Jesus roep ons om in sy voetspore te volg, om te dien soos Hy gedien het. Hierdie land van ons huisves uiteenlopende mense. Daar is 'n diep kloof van ongelykheid en verdeeldheid. Daar is groot nood en geweldige frustrasie.

Ek koester geen groot verwagtings van die nasionale dialoog nie. Ek verwag nie dat die maghebbers skielik die belang van die breë bevolking bo die belang van *die party* sal stel nie. Ek verwag nie dat die kleptokratiese kaders skielik 'n gewete sal ontwikkel nie. Of dat onbevoegde amptenare oornag bekwame administrateurs gaan word nie.

Maar die gawes wat God vir sy kerk gegee het, is gawes waarmee ons ook ons stukkende gemeenskap kan dien. Daarom wil ek lidmate en gemeentes aanmoedig om op plaaslike vlak forums vir dialoog te help skep. Sien die nood van mense raak wat in ander omstandighede worstel om siel en liggaam aanmekaar te hou. Luister na die klagtes en uitdagings van mense en groepe waarvan jy niks weet nie. Praat saam met die plaaslike gemeenskap om plaaslike probleme op te los. Kom ons leer mekaar ken, skep vertroue, welwillendheid en reik uit in 'n gees van medemenslikheid.

Met apologie aan die beroemde gedig van Adam Small wil ek dus afsluit:

*Nou vrinne
Die Here het gabring
Aan my sy wonnerwerke oek so
hy het gavra wat's in my [hart]
en vrinne in my*

*[hart
is die stem van my Heer*

*Kô, laat ons kyk!
Kô, laat ons luister!
Kô, laat ons praat!]*

Dr Wouter van Wyk
(Sekretaris: Kommissie van die Algemene Kerkvergadering)

Om Blitsposte ontvang, stuur 'n e-pos na bladuitleg@nhk.co.za of grafies@nhk.co.za en versoek dat u naam op die versendingslys geplaas word

Nuus, berigte en kort kommentaar (uiters 100 woorde) aan taal@nhk.co.za

Webblad van die Hervormde Kerk www.nhka.org

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

Alle bydraes vir *Blitspos* moet vir tyd en wyl aan beide taal@nhk.co.za en aan bladuitleg@nhk.co.za gestuur word. Mej Sanet du Plessis moet 'n operasie ondergaan en mev Francis Nel sal tydens mej Du Plessis se afwesigheid verantwoordelikheid vir *Blitspos* aanvaar.

Lief en leed



Theunis Frederick
Jakobus Dreyer

- Die Kerk wil graag haar gelukwense oordra aan **ds Thomas Dreyer (Malelane)** en sy vrou **Liza-Marié** met die geboorte van hul eersteling, Theunis Frederick Jakobus Dreyer. **Dr Frikkie Labuschagne (Sinodaal/SGB/dosent)** en sy vrou **Mariëtte** is 'n trotse oupa en ouma.
- Die volgende predikante verjaar tot **29 Augustus 2025**, en word hartlik geluk gewens:
 - Woensdag 20 Augustus: Di Y (Yvette) Scholtz (Meyerton) en MM (Marike) van der Merwe (nie-diensdoende predikant)
 - Vrydag 22 Augustus: Ds WH (William) Harmse (Alberton-Wes)
 - Dinsdag 26 Augustus: Dr C (Chris) le Roux (emeritus/Stellenbosch), di I (Iwana) Hartmann (Pretoria-Oos), en JJ (Joseph) Steyn (Klerksdorp-Suid)
 - Woensdag 27 Augustus: Prof JH (Johan) Koekemoer (emeritus)
 - Donderdag 28 Augustus: Ds GC (Gert) van Staden (emeritus)
 - Vrydag 29 Augustus: Ds J (Jan) van Immerzeel (emeritus)

Gemeentes en bediening

- Ringe** word aangemoedig om vóór die AKV 'n spesiale geleentheid (desnoods by wyse van videokonferensie) vir **predikante en afgevaardigdes** te reël waar hulle die **agenda van die AKV kan bespreek**.
- Enige saak wat volgens die Kerkorde onder die aandag van die **Kommissie van die AKV** gebring moet word, moet mev Karen Breedts (karen@nhk.co.za) asseblief **teen 25 Augustus** bereik **vir 4 September** se vergadering. **Geen laat sake** sal in die agenda opgeneem word nie.
- Gemeente Odendaalsrus** vier op **28 September 2025** hul 70-jaar herdenking onder die tema **70 jaar van genade** en nooi u hartlik uit om saam te kom deel in hierdie baie spesiale geleentheid. Die erediens begin om 10:30 by die kerkgebou in Boshoffstraat 30, Odendaalsrus, en word deur ds Cas du Plessis gelei, met nagmaal wat deur ds Anel Boshoff bedien word. 'n Skyfievertoning oor die gemeente se geskiedenis sal vertoon word, en daarna is daar 'n ligte ete en geleentheid om saam te kuier. Laat weet asseblief voor **14 September** hoeveel persone dit gaan bywoon.

Werksgeleentheid

- VAKATURE: PERSOONLIKE ASSISTENT VIR DIE BEDRYFSHOOF**

Sinodale Dienssentrum – Nederduitsch Hervormde Kerk van Afrika (NHKA)

Die NHKA nooi geskikte en dinamiese kandidate uit om aansoek te doen vir die pos van **Professionele Assistent vir die Bedryfshoof** by die **Sinodale Dienssentrum** in East Lynne, Pretoria.

Pligte en Verantwoordelikhede:

- Professionele administratiewe ondersteuning aan die Bedryfshoof.
- Hantering van korrespondensie, afsprake en vergaderings.
- Versameling, verwerking en verspreiding van inligting en dokumentasie.
- Koördinerende van interne en eksterne kommunikasie.
- Logistieke ondersteuning vir projekte en bestuursfunksies.
- Vertroulike hantering van inligting en sensitiewe sake.

Vereistes:

- 'n Geskikte kwalifikasie in administrasie, kantoorbestuur of 'n verwante veld.
- Ten minste drie jaar toepaslike werkserfaring in 'n soortgelyke rol.
- Uitstekende rekenaarvaardighede (MS Office-pakket, e-pos, datahantering).
- Vaardigheid in Afrikaans en Engels (geskrewe en gesproke).
- Sterk organisatoriese en kommunikasievaardighede.
- Diskresie, lojaliteit en 'n professionele ingesteldheid.

Aanstellingsvlak en vergoeding:

- Markverwante salaris gebaseer op kwalifikasies en ervaring.
- Voltydse pos gebaseer by die Sinodale Dienssentrum in Pretoria.

Aansoekprosedure:

Stuur asseblief 'n volledige CV vergesel van 'n motiveringsbrief en ten minste twee kontakbare verwysings na: johan@nhk.co.za of mannekrag@nhk.co.za

Sluitingsdatum vir aansoeke: 31 Augustus 2025

Let wel: Slegs kandidate wat aan die vereistes voldoen, sal vir 'n onderhoud genader word. Die NHKA behou die reg voor om nie 'n aanstelling te maak nie.

SP Engelbrecht-museum

• Kom span uit op oom Fanie se Werf!

Op Saterdag **30 Augustus** van **08:00 tot 14:00** word die SP Engelbrecht-museum van die NHKA (h/v Mansfieldlaan en Eloffstraat, Eloffsdal) 'n egte plaaswerf vol kultuur, kuier en pret! Bak saam miershoopbrood. Geniet volkspele en 'n stoeivertoning. Luister na Albert Blake se praatjie oor Jopie Fourie. Daar is ou karre, ritte op 'n 1910-High Wheeler-kar, baie boerespeletjies, lekker kos én die kans om jou eie ossewaentjie te wen. Toegang is gratis. 'n Opsionele donasie aan die Museum en inkomstebehoefte gemeentes in die Moot is welkom. Volg ons op [Facebook](#) en deel die uitnodiging! Oom Fanie nooi jou uit: *Kom kuier!*

Vergaderings

- Vrydag 22 Augustus: Raad van Finansies
- Woensdag 27 Augustus: NHKA Pensioenfonds

Kerklike en ander publikasies

- In die **Augustus 2025-uitgawe** van **Die Christelike Vrou** word die redaksioneel van **ds Hannelie Botha** gewy aan *Vrouedag 9 Augustus 2025* met haar redaksionele blik op Suid-Afrikaanse vroue wat hul tyd vooruit was. **Friena Maritz**, Gemeente Pretoria-Oos, deel haar passie met ons in *Liturgiese nadenke* en hoe geloof in musiek tot uiting kom in ons kerkmusiek. **Mari-lizé Beukes**, voorsitter NHSV Hoofbestuur, skyn die kollig op *Vrouedag, Vrouemaand en wyse vroue* en hul ontsag en liefde vir God. **Charmaine Fourie**, Uitvoerende Direkteur: RATA, brei uit oor *RATA se babasorgpakkies* en die verskil wat dit maak met die versorging van babas. **Rozelda Nel**, NHSV kantoor, vertel meer oor die onlangse *NHSV Inligtingssessie 2025* wat met die finalejaarteologiese studente by Gemeente Philadelphia plaasgevind het. **Ria Schempers**, streekvoorsitter NHSV Wes-Kaap sluit hierdie uitgawe af met die emeriti se saamkuier by Wiesenhof buite Franschhoek in *NHSV eer emeriti predikante in die Wes-Kaap*. Volg die skakel na ons NHSV publikasies <https://nhsv.org.za/publikasies/>.

- **Bybelgenootskap eer 1933-vertaling in Afrikaans se eeufeesjaar**

Eenhonderd jaar gelede het Afrikaans amptelik erkenning as 'n volwaardige taal ontvang. Minder as 'n dekade later, op 27 Augustus 1933, is nog 'n belangrike mylpaal bereik: die eerste volledige Bybel in Afrikaans is op dié dag amptelik in ontvangs geneem. Hierdie gebeurtenis het Afrikaanssprekende Christene nuwe hoop en 'n eie stem in hul geloofslewe gegee.

Die oorspronklike 1933-vertaling was nie net 'n geloofsdaad nie, maar ook 'n monument van taalontwikkeling en kultuurerfenis. Die vyf eindvertalers – drr JD Kestell, JD du Toit (Totius), EE van Rooyen, BB Keet en HCM Fourie – het bykans 10 jaar lank aan die vertaling gewerk om die Woord van God getrou in Afrikaans weer te gee.

Sedert daardie historiese dag in 1933 het die Bybelgenootskap van Suid-Afrika meer as 12 miljoen Afrikaanse Bybels versprei. Die invloed van die Bybel in Afrikaans weerklink al vir geslagte – van die oorspronklike 1933-vertaling tot die mees onlangse 2020-vertaling. Elke generasie het die Woord in sy eie tyd beleef, maar die oorspronklike vertaling bly 'n onwrikbare ankerpunt in ons geloofs- en taalgeskiedenis.

Ter viering van Afrikaans se eeufees het die Bybelgenootskap besluit om 'n gedenkuitgawe van die oorspronklike 1933-vertaling te publiseer. Hierdie spesiale uitgawe is beskikbaar in 'n swart hardeband en bevat nie net die volledige teks van die 1933-vertaling nie, maar ook bykomende materiaal wat die geskiedenis van Afrikaans en die Bybel vertel.

Soos Afrikaans sy 100ste bestaansjaar vier, word die Afrikaanse Bybel se 92-jarige erfenis 'n bron van trots en 'n kragtige bewys van die taal se vermoë om die ewige boodskap van hoop, geloof en verlossing te dra. In die woorde van ds HPM Steyn in 1933: *Die Afrikaanse Bybel moet nie net aangeskaf word nie, maar gelees en geleef word.*

Die 1933-vertaling is by jou naaste Bybelhuis of [hier](#) aanlyn beskikbaar.



R300

DIE UITGEBREIDE LITURGIESE KALENDER

'n Kategismus, asook historiese en teologiese toeligting

'n Boek wat elke predikant en belangstellende lidmaat moet hê om elke Sondag op 'n verantwoordelike wyse met die kerklike jaar, en so met die evangelie om te gaan!

Geskryf deur prof **Natie van Wyk**

Bestel van mev Sarie Roux by boekwinkel@nhk.co.za



R250

GESKIEDENIS VAN DIE HERVORMDE KERK 1824-2024

Ontdek die ryk geskiedenis van die Hervormde Kerk van 1824 tot 2024. Hierdie nuwe publikasie van prof Wim Dreyer bied 'n diepgaande blik op twee eeue van selfstandige kerkwees en die kragtige geloofsband tussen die Hervormde Kerk en die gedeelde geskiedenis van die Afrikaanse susterskerke.

'n Moef-lees vir elkeen wat belangstel in kerkgeskiedenis!

Beskikbaar by mev Sarie Roux by boekwinkel@nhk.co.za

Kom kyk saam

- Op 26 Julie het Gemeente Wonderboom basaar gehou! Kyk hoe kom lidmate en vriende van die kerk bymekaar vir 'n dag vol lekker kos, vermaak vir alle ouderdomme en selfs 'n hondeskou!

Kontak gerus vir ds Lilian Erasmus (083 255 2082) vir enige navrae oor Gemeente Wonderboom.

#nhka #gemeentewonderboom #basaar

'n Gedig

geboorteplek

daar waar die kapok onverwags verskyn
en daar waar die sonlig nie verdwyn
net daar het ek die lig aanskou
die vroedvrou was freneties maar het dit nie verbrou

die mense in die kerk het gesing met die doop
maar nog die water en nog die woord
het die dorp se gang laat verloop
net die stof van die strate het die atmosfeer verwoord

Hennie Maartens

<https://versindaba.co.za/2025/07/08/hennie-maartens-geboorteplek/>

Fondsinsamelings

- **Dis weer basaartyd!** Laat weet asseblief (taal@nhk.co.za) wanneer ons by julle heerlike pannekoek en basaarpoeding kan kom eet:
 - 30 Augustus: Rustenburg-Suid
Ottosdal
Ventersdorp
Witfontein
 - 6 September: Meyerton-Suid
Montana-Oos
 - 24 September: Oos-Moot
 - 27 September: Strand
Klerksdorp-Wilkoppies
- Dis weer daai tyd van die jaar! **Gemeente Ventersdorp** hou basaar saam met ons jaarlikse 4x4-dag.
 - Iets vir almal om te eet van soet tot sout, topgehalte vleis tot staatmaker pannekoek.
 - Stalletjies om van te kies en te keur.Ons sien jou daar! **30 Augustus 2025** by Trimpark Ventersdorp. Uitstallers is welkom.
Kontak vir Wessel 082 961 0144 vir enige navrae.



4 x 4 DAG

30 AUGUSTUS 2025

Aangebied deur die Hervormde Kerk Ventersdorp

Trimpark Ventersdorp

Baan vir alle 4x4 voertuie

Uitstallers is welkom

Navrae : 082 961 0144



Lootjies by Kharla: 084 024 3207

Bankbesonderhede:

Standard bank
Kharla Guest
Lopende rekening
Nr: 10167368255

Wenner
word op
1 September 2025
op ons
Facebook-blad
aangekondig.



- **Gemeente Montana-Oos** vier DV die naweek van 5-7 September 2025 haar **50ste bestaansjaar**. Oud-lidmate en belangstellendes word hartlik uitgenooi om die naweek saam met ons deur te bring. Die program vir die naweek is soos volg:
 - Vrydag 5 September: Vanaf 15:00: Spitbraaikuier vir die hele gesin/dans.
 - Saterdag 6 September: 08:00: Pretstap en basaar van 08:00-13:00. Heerlike eetgoed, uitstallings van verskeie produkte, geskenke en vermaak vir almal.
 - Sondag 7 September: 09:00: Feesdiens en nagmaal met lede van Hoërskool Montana se koor. Verversings na die diens.

Vir meer inligting, kontak ds Frikkie van Wyk 083 625 6788 of die skriba Johan Emmenis 060 546 7438 of stuur 'n epos na gfvanwyk@nhk.co.za.

- **Gemeente Klerksdorp-Suid** hou 'n **Blesbokkompetisie** teen R50 per inskrywing.
 - Eerste prys: 20 kg wors & 20 kg maalvleis
 - Tweede prys: 10 kg Wors & 10 kg maalveis
 Die gelukkige trekking vind op **7 September 2025** plaas.
WhatsApp vir Trudie (072 393 5187) vir enige navrae en aankoop van lootjies.
- Dit is amper weer tyd vir **Gemeente Makarios** se **jaarlikse gholfdag op 6 November 2025 by Kemptonpark se gholfbaan**. Koste: R2 000 vir 'n vierbal of R500 per speler. **Borgskappe per gat** is beskikbaar teen R500 per gat. **Vir meer besonderhede of om te RSVP** kan die volgende persone gekontak word:
 - Carina Cronje 079 515 8596
 - Riaan Mong 082 337 3146
 - Ds Frikkie Viljoen 082 906 7774
- Dit is weer tyd vir **Gemeente Kampersrus** Hoedspruit se **basaaarlootjies!** Daar is **meer as R45 000 se pryse** wat gewen kan word teen **slegs R100 per kaartjie!** Die pryse wissel van 'n heerlike haarpamperlang ter waarde van R400 tot verblyf in Mosambiek vir 6 persone ter waarde van R16 000.

Daar is twee maniere om deel te neem:

- Koop direk by Susan la Grange.
- Jy kan ook via WhatsApp jou kaartjie by 072 636 8001 bestel. Jy sal 'n genommerde kaartjie elektronies ontvang. Betaal regstreeks in die bankrekening met jou lootjienommer as verwysing.

Bankbesonderhede: Nederduitsch Hervormde Kerk, Standard Bank, Rekeningnommer 033358346, Takkode 052752.

Die trekking vind op **30 November** plaas!

- **Gemeente Witfontein 22ste Delwersfees: 30 Augustus 2025 vanaf 07:30**
 Met R42 000 se kontant op die spel by die delwerye met kleims ter waarde van R22 000, R10 000 en R5 000 en 'n klomp kleiner pryse en hope vermaak en kos, hou Gemeente

Witfontein haar 22ste Delwersfees. Delwersertifikate kan aanlyn gekoop word teen R25 elk by www.nhkwitfontein.co.za of by Suezette by 083 379 3398. Kom bederf jouself met 'n heerlike pelgrimsontbyt, boepensbroodjie, melkkos, of dalk iets van die koekfabriek of die poedingtafel. Alles wat 'n basaar 'n basaar maak, is hier om te geniet. Dit vind alles op die kerkterrein van NHK Witfontein, Stasiestraat 750, Pretoria Noord plaas.

Die Witfonteintreintjie en die pretpark wat om die treinstasie verrys, is 'n groot trekpleister vir al ons kinders. Ons borg ook minderbevoorregte kinders om vir ons tydens die fees te kom kuier en die dag saam met te geniet. Wil jy meer weet? Kyk gerus [hier](#).

Toerusting



- Op 19 Junie 325 nC is die eerste weergawe van die **Geloofsbelydenis van Nicea** amptelik aanvaar tydens die Konsilie van Nicea. Wêreldwyd vier kerke vanjaar hierdie gebeurtenis van 1 700 jaar gelede. Die Hervormde Teologiese Kollege het 'n **inligtingsblad** geskep oor Nicea wat gemeentes kan help om op hul eie manier Nicea te herdenk. Klik [hier](#) vir die inligtingsblad. Dit is 'n dinamiese blad en word gereeld bygewerk met nuwe inligting. Hou die gereelde advertensie in *Blitspos* dop om op hoogte te bly.

Vier Nicea 1 700 jaar later

HTK se tema vir VTT 2025 is **"Nicea 1700 – Ek getuig"**.

Gemeentes word hartlik uitgenooi om tussen **3 Augustus en 19 Oktober 2025** aktief deel te neem aan hierdie opwindende projek.

Wat is beskikbaar?
 Baie inligting
 Liturgiese riglyne en preeksetse
 Toerustingsmateriaal

Besoek: <https://hervormdeteologie.co.za/>
 Laat ons saam getuig van ons geloof – 1700 jaar ná Nicea!

Barmhartigheid

- Die **OTMT** is in die proses om die **Van Rensburg-tehuis in Danville** te verkoop en al die inwoners moet na Ons Tuis Riviera verhuis. Hulle benodig 'n vervoermaatskappy om die inwoners se besittings en die tehuis se meublement/toerusting gedurende **Augustus** te trek. U word vriendelik versoek om **Hannelie Fourie** by hf@otmt.org te kontak indien u weet van iemand wat hiermee behulpsaam kan wees aangesien die OTMT nie oor die fondse beskik om vir die diens te betaal nie.
- Vrywillige uitbetalings – Augustus 2025:** Baie dankie aan elke NHSV-tak en gemeente vir u getroue ondersteuning en bydraes deur die jare heen. U gee nie net finansiële nie – u gee hoop, hulp en liefde. Elke bydrae dra werklik daartoe by om 'n verskil te maak in die lewens van bejaardes, studente en behoeftiges regoor ons land.

Die uitbetalings wat in Augustus gedoen word, ondersteun vier belangrike fokusareas: Bejaardesorg by Ons Tuis en elders in die land, studielenings aan Hervormde studente, barmhartigheidswerk in ons gemeenskappe, en ons tydskrif *Die Christelike Vrou*.

Ons vra dat elke NHSV-tak probeer om 'n derde van haar inkomste aan die Hoofbestuur oor te dra. Dit stel ons in staat om landswyd hulp te verleen waar daar tans soveel nood is. Die oorblywende twee derdes kan volgens die tak se eie oordeel aan plaaslike behoeftes en projekte bestee word.

Neem asseblief kennis dat oorbetalings aan plaaslike instansies, soos tehuise vir bejaardes, direk vanaf die tak of gemeente aan daardie instansies oorbetaal moet word.



Elektroniese betalings en bankdeposito's is welkom – klik [hier](#) vir die NHSV se betaalstaat. Stuur asseblief die ingevulde betaalstaat én bewys van betaling aan finansies@nhsv.org.za.

Met opregte dank vir elke oop hand en warm hart. Laat ons sáám die lig wees in 2025.



- Kom stap saam met **Sestig-sestig-loop-vir-'n-kind**. Hierdie fondsinsameling vir die DPS-huise van van Montana en Ninapark vin op **24 September** by Gemeente Oos-Moot se Magaliesfees plaas. Die doel is om **60 km te stap en R60 000** in te samel. Spanne van ses kan inskryf of finansiële donasies kan gemaak word. U bydrae om by R 60 000 uit te kom, kan inbetaal word by:

Plesion NPC
Bank: Nedbank
Rekeningnommer: 1127321897
Verwysing: Walk for Child

Kontak info@plesion.org.za vir meer inligting.

- **Seniordal-aftreeoord** is die eiendom van die NHKA se **Gemeente Pretoria** en spesialiseer in lewensregverkope en verhuring aan selfversorgende persone ouer as 55 jaar. Die oord is geleë in die veilige omgewing van Rietondale in Pretoria. Seniordal beskik oor 24-uur-veiligheidsdienste en toegangsbeheer, en bestaan uit die volgende woonstelle:

- Eenslaapkamer: R515 000
- 1½-slaapkamer: R520 000
- Tweeslaapkamer: R560 000

Kontak Salomie Stolz by 012 329 4313 (08:00-12:00) of 083 308 0520 (na-ure) vir meer inligting.

- **Herfsakker Selfsorg-aftreeoord in Groblersdal:** Behuising beskikbaar vir persone ouer as 60. Geen versorging beskikbaar nie, persone moet selfversorgend wees. Geen etes word voorsien nie. Eie tuin. Tariewe is per vierkante meter en verskil van huis tot huis. 'n Deposito van twee maande huur is betaalbaar. Vir meer besonderhede, skakel Frik Rossouw by 082 830 6591.
- **Belfast Rusoord** bied onder meer 24-uur mediese versorging, CCTV, 24-uur-toegangsbeheer, drie gebalanseerde maaltye per dag, en aktiwiteite vir elkeen. Daar is fasiliteite vir semiversorging, verswakte bejaardes, en woonstelle vir selfversorging. Kontak Riana de Villiers by 013 253 31211 / 063 663 7449 / manager@belfastrusoord.co.za vir meer inligting en tariewe.
- **Athalia Uitreik in Bloemfontein** bied verblyf vir en versorging van bejaardes en persone met gestremdhede. Daar is enkel- en deulkamergeriewe in 'n huislike atmosfeer, verblyf met drie etes ingesluit, verblyf sonder versorging, en 24-uur-versorging. Navrae: 079 826 6363 / 084 023 0315 / 051 522 6089 / navrae@athalia.co.za / www.athalia.co.za.

Betaalde advertensies in hierdie nuusbrieff

Advertensies waarvan 'n private individu of instansie die begunstigde is, of waarin 'n gemeente 'n projek prominent wil bekendstel, kan in hierdie nuusbrieff geplaas word. (Tekskennisgewings van gemeentes is gratis.) Indien 'n jpg-weergawe van die advertensie voorsien word, moet dit **15,5 cm breed x 6,5 cm hoog wees, resolusie 1878 x 815 pixels, 150-300 dpi**.

Stuur die voorgestelde **teks van nie meer nie as 75 woorde** met of sonder eenvoudige grafika of 'n foto saam met die bewys van betaling aan **mej Sanet du Plessis**, per e-pos na taal@nhk.co.za. GEEN advertensie sal geplaas word sonder die betalingsbewys nie.

Die **teks en bewys van betaling** moet mej Du Plessis bereik teen 16:00 op die Maandag voor die betrokke uitgawe se verskyning. *Blitspos* word normaalweg die Woensdagoggend afgehandel en teen die middag op die webblad gelaai. Indien die plasing meer as een keer moet geskied, moet aangedui word op watter datums dit moet verskyn, met betaling vooruit vir al die beoogde plasinge.

Die koste is R250 per plasing (BTW ingesluit). Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, **verwysing: u naam + Blitspos. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.**

Gebed vir die week

Almagtige God

Ek is steeds in stille verwondering oor u almag.

Dankie vir die wind en die wolke;

die bome en die voëls daarin;

die land en die see.

En dankie dat U tussen al hierdie skeppingswonders

nog plek vir die mensekind voorberei het.

Help my om U in die skepping te sien en U Majesteit altyd te loof!

Amen.

(Uit: *Briewe aan God*. Lizette Murray. 2018)